

# Permainan COC mengasyikkan

KITA melahirkan rasa bangga kerana dunia makin maju dengan penciptaan pelbagai aplikasi dan permainan online. Namun di sebalik perasaan bangga tersebut, ia sebenarnya memberi impak negatif kepada mahasiswa seluruh dunia. Misalnya permainan COC, selain menjadi permainan hangat kalangan mahasiswa, permainan itu sebenarnya meleakakan.

Penuntut Usim, Abdul Hafiz Hamzah berkata, tugas penuntut yang pertama ialah menjalani amanah ibu bapa untuk belajar bersungguh-sungguh. Namun, masih ada sesetengah penuntut hanya leka dengan permainan COC dan terus cenderung dan khayal serta mereka telah lupa amanah yang diberikan oleh keluarga untuk belajar dengan baik.

Katanya, tidak salah untuk hiburan hati dengan bermain COC ini. Selaku mahasiswa, mereka perlu bijak dalam membahagikan masa antara perkara yang penting atau sia-sia.

"Saya lihat, siswa-siswi sering bermain permainan ini sewaktu proses pengkuliahkan sedang berlangsung. Jika ini berterusan, di mana adab kita selaku seorang penuntut kepada pensyarah yang sedang mencurahkan ilmu mereka kepada kita," katanya tegas.

Firman ALLAH SWT bermaksud: Demi Masa, Sesungguhnya manusia itu dalam kerugian, kecuali orang-orang yang beriman dan beramal soleh dan mereka pula berpesan-pesan dengan kebenaran serta berpesan-pesan dengan kesabaran - *Surah Al-Asr* ayat 1-3.

Selaku mahasiswa Islam yang berintegriti, kita perlu bijak dalam membahagikan masa ketika belajar atau menghiburkan hati ketika dibebani dengan pelbagai tugas seharian.

"COC adalah sejenis permainan yang boleh menjejaskan kehidupan seorang mahasiswa

yang kurang bijak membahagi masa untuk berhibur. Terlalu pentingkan keseronokan sementara itu memang tidak menjadi kesalahan, yang menjadi kesalahan terbesar ialah apabila tanggungjawab utama kita terabai. Itulah sikap segelintir mahasiswa yang selalunya membawa bahaya, kadang kala kehidupan kita rosak disebabkan oleh diri sendiri," ujarnya.

Abdul Hafiz berkata, penuntut yang terlalu asyik bermain dengan permainan COC ini sudah pasti masa untuk tidur tidak menentu. Hal ini disebabkan mereka terlalu asyik menjaga *village* sehingga tidak sempat menjaga waktu tidur sendiri.

"Selaku seorang siswa, penjagaan waktu tidur amat penting kerana dengan tidur kita akan dapat kembali tenaga baru setelah seharian menjalani amanah sebagai siswa.

"Selain dari penjagaan *village* daripada diserang oleh pihak lain, mereka juga akan sertai *war* dalam permainan tersebut semata-mata untuk mendapat piala dan duit untuk menaik taraf *defender* sedia ada. Apabila masa untuk tidur tidak menentu, sudah pasti kebanyakan daripada mereka hadir ke kuliah dalam keadaan tidak bersemangat untuk belajar," katanya.

